

Solelheta (6/7)

Lo Bernadonet e la Solelheta èran ja luènh. S'èran arrestats a l'òrle d'una clòta, e la Solelheta amassava de pimparèlas. Aquí que lo Bernadonet vegèt lo Drac qu'arribava :

« Agacha-lo enlà ! diguèt ; sèm perduts ! »

Mas la Solelheta li diguèt :

« Ajas pas páur. Per la vertut de ma bagueta, que tu siáis guit e ieu guiteta. »

Sul còp, lo Bernadonet foguèt guit e ela guiteta, e se n'anèron dins la clòta.

Lo Drac arribèt e diguèt :

« Adieu-siatz, guit e guiteta. Avètz pas vist un gojat e una filheta ?

Fat ! fat ! fat !

Vos disi s'avètz pas vist un gojat e una filheta passar.

Fat ! fat ! fat !»

Ne poguèt pas tirar mai, e se'n tornèt.

Quand arribèt, sa femna li diguèt :

« E ben ! los menas pas ?

Ò ! non ; ai pas trobat qu'un guit e una guita. Lor ai demandat se los avián vistes passar e, per tota responsa, me fasián pas que dire : "Fat ! fat ! fat ! "

A bèstia ! èran pas qu'eles : los te caliá menar. Torna-z-i, e, aqueste còp, mena-los. »

E tornèt partir.

Lo Bernadonet lo vegèt venir.

« Solelheta, aici ton paire que torna ; sèm perduts ! »

Mas la Solelheta diguèt :

« Ajas pas páur. Per la vertut de ma bagueta, que tu siás aucelet e ieu auceleta ! »

E sul còp, lo Bernadonet foguèt aucelet e ela auceleta.

Lo Drac arribèt ; e diguèt :

« Adieu-siatz, aucelet e auceleta. Avètz pas vist un gojat e una filheta ?

Riu-chiu-chiu-chiu-chiu ! riu-chiu-chiu-chiu-chiu !

Vos disi s'avètz pas vist un gojat e una filheta passar.

Riu-chiu-chiu-chiu-chiu ! riu-chiu-chiu-chiu-chiu !

Ne poguèt pas tirar mai, e se'n tornèt.

Quand arribèt, sa femna li diguèt :

« E ben ! los menas pas ?

Ò non ; ai pas trobat qu'un aucelet e una auceleta, lor ai demandat se los avián vistes passar e, per tota responsa, fasián pas que me dire : "Riu-chiu-chiu-chiu-chiu. "

A ! bèstia ! èran pas qu'eles : los te caliá menar. Torna-z-i.

A ! soi tròp las, diguèt lo Drac ; que se n'anen ont voldràn ! Ieu, torni pas los quèrre.

Te redisi que t'i cal tornar. »

E tanplan i tornèt.

Quand lo vegèron venir, lo Bernadonet e la Solelheta arribàvan a un riu. La Solelheta diguèt :

« Ajas pas páur, Bernadonet. Per la vertut de ma bagueta, que ieu siái sul riu palanqueta e que tu siáis lo barreràs ! »

E sul còp, lo Bernadonet foguèt barreràs e ela palanqueta.

Questions Solelheta (6/7)

1) Que fa Solelheta quand Bernadonet vei lo Drac arribar pel primièr còp ?

.....
.....

2) Quina solucion tròba Solelheta per se far pas reconéisser ?

.....
.....

3) Que demanda lo Drac al guit e a la guiteta ?

.....
.....

4) Perqué la femna del Drac es pas contenta ?

.....
.....

5) En quines animals se cambian los dròlles pel second còp ?

.....

6) Aqueste còp, lo Drac los tròba ?

.....

7) Dessenha Bernadonet e Solelheta a la tresena transformacion.